

拾遺

序

傳

祭文

碣銘

疏

狀

劄

啓

晦齋集
智

晦齋先生集卷之十一

拾遺 序 傳 祭文 碣銘

大學章句補遺序

古昔聖人教人之法有綱有目孔子講而明之以授其徒曾子述之以傳于世其淵源所自亦可考矣虞書曰克明峻德以親九族九族既睦平章百姓百姓昭明協和萬邦黎民於變時雍又曰人心惟危道心惟微惟精惟一允執厥中大學一篇之旨蓋本於此其曰明峻德以至於黎民於變者明德新民之至也其曰惟精惟一者明明德之事也其曰允執厥中者



明明德之止於至善而新民之止於至善亦由於此也。以八條目言之。明峻德者。脩身以上之事也。親九族者。齊家之事也。平章百姓。以至於協和萬邦者。治國平天下之事也。八條目中正心二字。實自虞書中來。其曰格致誠正。精一之謂也。前後聖人盡性立教之規合如符節。炳如日星。無可疑者。可見孔子祖述堯舜之道。而曾子之所傳實源於此也。秦火之餘。聖遠言湮。千有餘載。幸而天未喪斯文。程朱數君子出而乃始表章此篇。更定錯誤。發揮微蘊。一篇之中。綱條粲然。於是爲學者知所務。而爲治者知所本。其有

功於斯道也大矣獨恨聖經賢傳之文不能無斷缺
辭義未完學者不得見全書此真千古遺憾朱子得
其結語一句知其爲釋格物致知之義而未得其文
遂取程子之意以補之其所以發明始學窮理之要
亦甚明備然愚嘗讀至於此每嘆本文之未得見近
歲聞中朝有大儒得其闕文於篇中更著章句欲得
見之而不可得乃敢以臆見取經文中二節以爲格
物致知章之文旣而反覆參玩辭足義明無欠於經
文而有補於傳義又與上下文義脉絡貫通雖晦庵
復起亦或有取於斯矣又按聽訟一節今在傳三章

之後文義不屬有可疑者乃依程子所定置於經文
之下詳味其義與中庸卒章子懷明德不大聲以色
子曰聲色之於以化民末也奏假無言時靡有爭不
賞而民勸不怒而民威於鈇鉞之意合此蓋聖人端
本化民之要道也故曾子於經文章末引孔子之言
以明之程子於此豈無所見乎然愚陋管窺何敢執
以爲是而有得於先儒所未到之意聊記淺見以求
正於後之君子云爾嘉靖己酉冬十月甲子驪江李
彥迪謹書

中庸九經衍義序

臣謹按中庸孔子告魯哀公以爲政之道而遂及於
爲天下國家之目所謂九經是也其序首之以脩身
而次之以尊賢親親又次之以敬大臣體羣臣子庶
民來百工以至於柔遠人懷諸侯由本而及於末由
近而及於遠蓋與大學之八條目相爲表裏帝王爲
治之規模備矣竊謂大學之書教學者以脩己治人
之道故詳於進修之功而畧於爲治之目中庸之九
經告人君以爲政之道故詳於經世之目而畧於脩
己之功二書之義蓋互相發也由大學之道而欲收
治平之功不可不取中庸之九經以爲設施之條目

由中庸之九經而欲盡脩身之道不可不取大學之格致誠正以爲進修之階級其序有不可亂而功不可闕也然竊詳孔子之意上文言好學力行知耻而繼之以知斯三者則知所以脩身下文又言明善誠身而繼之以學問思辨之說其意亦可知矣蓋必學以明善然後可以誠身而脩身之道盡矣上文所謂好學者乃所以明善也力行者乃所以誠身也明善者格物致知之謂也誠身者已誠意正心脩身而總目之也然則格致誠正之目雖不列於九經之中而其意已具於一章之內也臣又按孔子旣叙九經之

目而繼之曰所以行之者一蓋一者誠也誠者天道也九經之道皆本於人主之心人主之心一有未誠而不純乎天道則九者皆爲虛文矣然則帝王爲治之範雖在於九經而九經之所由行則又在於體天道也詩所謂殷之克配上帝文王之德之純皆所以體天道也人君體天之道則必能嚴恭寅畏無時豫怠此所謂畏天命也大學平天下章始言克配上帝又言惟命不予常者亦此意也爲治之道雖曰多端求其所以繼天立極之要蓋在於此人主之心頃刻不在於配天則念慮之發刑政之施人欲雜之而有

違於天道矣有一念不在於敬天則怠荒之萌驕泰之滋有不能制而獲譴於上帝矣古之聖君賢臣都俞陳戒之際莫不以是爲先者蓋爲此也先儒真德秀衍大學之義闡明治道之要而尚遺治平之二條近世丘濬補衍義之闕略以備經世之務而又未及於配天敬天之說是乃智者之千慮一失蓋亦有待於後人也臣之孤陋管窺有見於此乃敢不揆愚淺竊倣二書之例推本先聖之訓參以諸賢之論及諸史百氏之說微臣一得之愚亦竊附焉隨其條目而推廣其義名之曰九經衍義其以講學明理誠意正

心爲脩身之目者所以本中庸之旨而取大學進修之目以明脩身之道必由此而進也其以體天道畏天命繼之於九經之後者所以本中庸行之者一之意而明帝王修天職保天位之道在於此也其以戒滿盈終之者是亦畏天命之事而治定功成之後尤不可不以此爲戒也蓋中庸之九經見於事爲而本於人主之心者也體天道以下三條本於人主之心而見於治化者也曾子言君子所貴乎道者三籩豆之事則有司存焉帝王爲治之道亦猶是也國家憲章法度無非道體之所該爲治之切務人主所當講

究而留意然此皆有司之事而且前代之常規先
王之舊制但當遵而勿失又得賢才而任之職則事
無不舉矣至於隨時損益使合於中亦在於人也若
夫曰修曰尊曰親曰敬曰體曰子則皆人君心上事
也不可不自盡也而至於體天道畏天命則尤有關
於奉天勅天之事人主所當日夕兢惕服膺而不可
斯須忘者也先聖之叙九經所以立經世之規模以
為萬世法也臣之所衍非有所增加於聖訓所以本
先聖之意而要以盡九經之道固非臣之私意杜撰
也大學之八目真氏丘氏之衍備矣治天下之律令

格例於斯具矣然不參考中庸九經之義以盡設施

之條目以立治化之大本

謂行之者一

則其於帝王經世

之道亦有所未盡矣巨學不足以適用文不足以達

意偶因所見妄有所陳非敢犯不韙之罪而要以立

駕於前賢蓋欲推明先聖垂訓之奧旨無採二書之

精要以備經世之法而爲

聖明之獻也極知脩

踰難進妄作之誅然於帝王存心出治之道常德配

天之要未必無少補儻於宮庭燕閑之地既取二

子之書參玩而講明之氣取微臣之所衍潛心而深

味之本之心以施于政化法乎天而無所間斷則帝

三繼天立極之道盡善全美而堯舜三王之盛可以
復見於今日矣臣之惓惓實在於此惟
明主懇
察焉臣彥迪謹序

求仁錄序

天之道有四德而元為之長人之性具五常而仁為
之首斯所謂心德之全而萬善之本也聖門之教千
言萬語無非在於求仁而其所以求端用力之方見
於語孟諸經者明且備矣但其言散出於諸篇而或
因門人問答而發者有大小深淺之不同有難以領
會者蓋必類聚觀之體認出來自可得程氏誨人之

要法而張南軒又著洙泗言仁錄蓋亦爲是也而其
書不傳今不可得見余竊有慕於斯輒不自揆乃取
先聖之訓及諸弟子子思孟氏之說類聚爲編諸儒
註解要切之言亦略附錄又採先儒之論發明仁體
及用功之要者別爲一篇以備參究名曰求仁錄欲
其便於考索暮年閑中潛玩深體力行庶無大過云
爾夫仁者天下之公非有我之得私也有志之士於
此或有取焉則非徒足以成己亦可以及物矣君子
一念之惻隱有足以澤及百世況乎有位者而志於
仁其德施又將何所不至哉嘉靖庚戌十月丙子晦

齋驪江李彥迪書

奉先雜儀序

奉先雜儀本於朱文公家禮而參以司馬公程氏祭禮及時俗之宜稍加損益務從簡易以爲一家之禮庶幾宜於今而遵守勿替云爾夫祭祀之義有本有文無本不立無文不行存乎心者本也著於物者文也蓋必文與本氣盡始可謂之盡祭之義存乎心者有所未盡焉則節文雖備是亦虛而已矣故又採禮經之文及先聖賢之言有明報本追遠之義者別爲一篇以附于後仁人孝子於此潛心而深體之則愛

敬之根於心者油然而發而自有不能已者矣嘉靖
庚戌八月甲子驪江李彥迪謹書

沙伐國傳

今聞朝列皆爲好議欲以寬仁大度補導 聖明

蕩滌無辜以爲太平之治而獨有數三負爲悖論主
其議者乃沙伐古國居崇品宰相也右公之欲害士
類蓋有以也嘗聞右公父溺愛其妾及妻子等多給
田民嫡子息則薄待少給田民故常時蓄憤於庶母
去壬寅年間厥父死右公爲大司諫居父喪厥兄又
病死乃使兄之妻呈訴於官曰庶母孽弟等爲妖術

以致厥夫之死請囚禁治罪牧使宋希奎疑其無證據不受理右公乃折簡潛通於牧使請速囚禁報使刑推宋公不得已囚禁庶母及孽弟數人報使刑至三四次是時某以四宰受由覲親往來宋公見某言其事某答曰父之愛妾愛子何忍以黯黯難明之事父喪內至於囚禁極爲未安君何爲此乎宋乃披囊出其手簡以示曰如此故不得已報使也某默然不言到咸昌寄書於右公極言刑庶母庶弟未安之意而止之且言吾愛公之深故如是言之其答書畧無自責之意多有憤恨之辭到聞慶縣監安景祐以推

官深知其事亦言其殘忍未便之意安公口滑嫉惡人也逢人即說厥後景遇見某亦言其殘忍未便之言右公喪畢後復職恐其事發於公論深懷疑畏及爲大司諫辭免時乃舉刑廢母之事發明啓之近來乘除逆之勢致位崇品將升相位欲盡除知己薄行者以滅口使一世之人無復知之乃列錄本道居朝官宰相及沙汰鄰境居人知其事者陰授權臣使盡除去伊人一從其言丁未之禍宋希奎亦預之安景祐以南行外官無預於朝論而亦被禍遠竄其情狀昭然甚可痛心書名陰授權臣之事有權臣切親分

明言之者此事若使朝廷知豈不有補於累政乎

按

戎尚州舊號宰相金光準也景遇權應昌字也

祭孫四宰文

外姪守成均館司成某謹以清酌庶羞之奠敬祭于
卒議政府右叅贊月城君孫公之靈惟靈弘大剛毅
得之天資德成行尊不假修爲蚤承庭訓發憤篤學
卓然樹立增光先烈出入歷數蔚有聲績所施所履
惟忠惟直歷事三朝始終一節累被薦擢乃金乃玉
位列廊廟職贊調燮朝野倚重
宸眷彌隆白首
康彊夙夜匪躬方期耆耄爲國耆龜天胡遽奪而不

愁遺道路咨嗟百僚隕淚親戚悲慟如失怙恃生榮
死哀惟德之崇矧余鈍頑夙遭愍凶幼孤無歸年未
成童桀桀悶悶惟舅是托特加矜念誘掖諄切誨我
養我不異己子粗識義方皆舅之賜觀光筮仕旅食
京師薄官羈窮是資是依親老乞養分符外補製錦
迷方一言求教曰惟莅民只在慎怒語約理盡我病
深規奉以周旋幸不失隨還朝省侍鬚髮改舊仰視
儀刑心竊喜懼忘身憂國勤勞不遑尚冀壽考志氣
充剛豈知微恙奄忽至此撫膺長號肝膈摧毀嗚呼
哀哉去春南行丁寧留止余竊覲省不能順志視我

猶子我不如父不肖無狀恩義永負遠在嶺表凶計
遠傳歛不憑棺吞恨窮天返葬故丘道路阻邈護輦
臨窆是實吾責真以叙哀痛曷窮已不忘者存鑑此
哀意嗚呼哀哉尚饗

祭金墓齋

安國

文

躬粹奎壁稟精山岳學窮道源神游理窟明幽中積
彪炳外發志慕軒虞身許稷契際遇昌期歷敷華秩
雍容經幄激昂臺閣一誠貫天萬事盡職時有亨泰
道無伸屈廊廟山澤其心則一卅載優游造養純熟
精義入神窮深極微舉世欽風多士摳衣否極泰來

又被寵擢皓髮朝端赤心循國咫尺
天顏畎畝
懷抱得喪歸天唯思盡道德協弘化功贊調燮官長
春夏祀秩戎詰畢精匪躬纖微必親著龜朝宗領袖
摺紳展展經綸翼我
聖神理昧難常天不可必
一疾不瘳冥奪何速
當宁震悼朝野慘怛斯民
無祿吾道誰托吾儕無似幸忝下僚屢承警咳景仰
高標寧知今日永隔儀刑慟兼公私情激幽明聊奠
泂酌冀歆微誠

孫夫人諱日祝文

風樹悲纏霜露痛迫歲星四周尚未奔哭慘怛邊城

諱日又復迫遠感時昊天罔極敢以清酌庶羞祇薦
歲事尚饗

告家廟文

不慎遺體疾病多纏勿藥難期灸艾自燃不惜肌膚
罪重毀傷乃今月朔身在山房未克躬省深增感慕
茲因菲奠遙陳事故

夫人洪氏墓碣銘

夫人姓洪氏南陽人曾祖諱仁老朝散大夫禮賓寺
少尹祖諱吉從修義副尉忠武侍衛司右領副司直
考諱欽孫修義副尉龍驤衛右領副司猛司猛娶谷

山韓氏諱叔老之女以天順八年甲申月日生夫人
自少資性異常既笄適議政府右叅贊月城君孫公
諱仲瞻貞順端莊婦道純備事姑以敬宜家以和月
城敬之如賓庚申八月二十三日卒于月城任所梁
山郡享年三十七以是年月日葬興海郡治南達田
里禱陰山之原夫人生一男三女子瞻忠義衛顯信
校尉女長適叅奉金末孫次適叅奉曹國良李適叅
奉鄭灝瞻生三子曰光曙曰光暉曰光晁俱爲忠義
衛銘曰
性稟貞淑德全端一率禮蹈和宜家宜族處世雖短

綿慶猶長銘以刻石爲永無疆

夫人崔氏墓碣銘

夫人姓崔氏和順人曾祖諱自江彰信校尉祖諱善
門資憲大夫工曹判書考諱漢男成均進士進士娶
啓功郎李梅之女以成化癸卯十一月日生夫人自
少資性端莊旣笄適議政府右叅贊月城君孫公諱
仲瞻內治整肅婦德純備月城相敬如賓客立朝居
宦多賴其內助宗族亦皆欽慕焉月城卒于嘉靖己
丑四月癸興海郡治南達田里禱陰山之原後十七
年乙巳十一月二十一日夫人亦卒享年六十三以

丙午二月初三日窆于月城君幽堂之後生二子二
女俱夭嗚呼夫人早述名賢修善積德無所欠缺而
子女皆不留膝下天獨留於此何哉月城君有先室
子曰瞰生子光曙爲夫人執喪廬墓亦足慰幽魂銘
曰

生稟貞粹夙配賢哲率禮蹈和儀範閨闈慶衍德門
蘭茁不育惟天福善冥報難必未亡十載壽纔逾六
窆同夫原夙願乃終刻詩玄石爲示無窮

忠義衛孫君墓碣文

君諱瞰字如晦雞林孫氏曾祖諱士晟贈兵曹參判

雞城君祖諱昭贈吏曹判書雞川君考諱仲敷議政
府右叅贊月城君妣曰貞夫人洪氏有明弘治壬子
十一月初三日生君少而英秀人皆謂可繼門業弱
冠嬰疾絕意遊宦所居有江山之勝雉于山魚于水
優游卒歲嘉靖八年四月月城君卒于京君聞訃號
慟絕而復甦宿疾轉劇不能奔喪依禮文設位成服
是月二十六日辛卯終聞喪之十日也年三十八是
年十一月丙申葬興海郡達田里禱陰山之原君娶
信川康氏進士士淵之女生三男一女長曰光曙忠
義衛次曰光暉曰光現與女皆幼云

訓道金君墓碣銘

君諱嗣字紹元號揚谿懦隱水原金氏實新羅敬順
王之後五世祖諱曰桂仁高麗官至版圖判書乃敬
順王十九世孫也高祖諱漢真仕門下贊成事推忠
秉節翊衛功臣封隋城君賜鄉水原曾王父諱尚旅
嘉善大夫忠清道兵馬使王父諱禮仲振義副尉考
諱叔南忠順衛迪順副尉妣雞林孫氏生負士寧之
女君生而敦厚英達博學多聞為文冠絕倫輩九舉
發解而為魁者二其中司馬試者至於十三而竟不
成名嗚呼命之舛耶時不遇耶奕世餘慶叢而未稔

積德流祉其後宜大秀而不實為善者惑君既不得
志奮然棄舉業結廬種竹安貧守道逍遙自適接人
無貴賤一以忠款鄉邑敬慕之後生之問業考德者
皆歸焉初授仁同訓導晚又授永川訓導居官處鄉
教誨不怠名賢碩士有出其門者嘉靖癸巳二月丁
丑以疾終享年八十五是年十一月丙辰窆于安康
縣北巖山之原君娶慶州崔氏龍驤衛井冽之女生
一子叅奉壽亨追慕先德思有以圖不朽請銘于前
司諫李彥迪彥迪於公為親屬自幼陪杖屨受訓誨
多矣義不可辭銘曰

匪爵而尊匪祿而富得之於天有文有壽落落名場
翼翼猷猷太古襟懷閑中碁酒錦繡心腸冰雪操守
才不時施德足垂後銘以刻石用詒悠久

叅奉崔君墓碣銘

君諱永麟字仰止慶州人鄉貢進士宗抵之後高
麗末君之五世祖濕龍才稱白眉之良而屢舉不中
朝啓于上特設恩賜科得以出身登仕郎秘書正字
濕龍生洪進士洪生興茂叅奉興茂生九精定略將
軍九精生山海生寅是君之考也妣曰桂城徐氏宣
務郎中部令思理之女成化八年壬辰九月壬子生

君君天性醇真事親盡孝晨昏定省不廢風雨居母
憂哀毀過禮廬墓啜粥五日一來省親嚴親生負年
踰七十宿疾沉綿日夜侍藥不離衣不解帶者數年
屢至嘗糞及其捐館號痛仆地幾絕復蘇喪禮一依
朱文公家禮亦廬墓三年啜粥不食鹽醬喪畢不輟
朔望奠孝行純篤鄉里敬慕正德十三年戊寅監司
金安國上其孝行於朝錄輿地勝覽嘉靖十七年
戊戌三月二十三日以疾終享年六十七越明年正
月壬申窆于萬佛山艮坐坤向之原君姬慶州金氏
宣略將軍虔義之女生二男二女女長適司直李叔

全次適忠贊衛李世發男長曰德崇義陵祭奉次曰
德潤長女生二女四男長希顏次希曾次希程次希
閔女壻崔三樂長男生一男三女女壻忠義衛孫光
暉男乙台内外子孫并十五人德崇欲顯親之丹悃
昭焯于後世請銘于左贊成李彥迪彥迪義不敢辭
銘曰

性稟醇真行全孝悌生事盡職死葬盡禮哀過於喪
誠篤於祭名登輿地德垂後裔銘以刻石永諭來世

孺人金氏墓碣銘

孺人姓金氏慶州人生貧讓之後曾祖諱敬存生貧

祖諱恂進義校尉考諱處義宣略將軍將軍嫗永川
崔氏內寺別監弘淑之女成化元年己酉九月己巳
生孺人適將仕郎箕子殿叅奉崔永麟孺人天性溫
和內治有度奉養舅姑盡心竭力親執祭物終始不
怠州以高年聞予朝乃授孺人之職嘉靖二十五
年丙午正月初七日以疾終享年八十二是年三月
壬申遷于萬佛山之原叅奉幽堂之後生二男二女男長
曰德崇義陵叅奉次曰德潤女長適司直李叔全次
適忠貲衛李世發內外子孫并十五人銘曰
溫恭柔淑婦道純備儆戒承順無違夫子祗奉舅姑

敬謹祭祀有德有壽年八旬二刻詩墓碣為示後嗣

晦齋先生集卷之十一



Handwritten text, possibly a date or signature, located below the stamp.

Handwritten text, possibly a date or signature, located at the bottom right of the page.

晦齋先生集卷之十二

疏

弘文館上疏

辛丑四月副提學

除弘文
中宗朝

臣等伏以天人之際一理貫通上下無間天有愛君之心而人有應天之實故積誠以動天修德以勝災則天雖難感於是而可感矣災雖難弭於是而可弭矣雖然人君以藐然中處之身而感高高在上之天以恐懼修省之力而回赫然震動之警非可以尋常舉措期月而得其效也伏惟主上殿下以仁聖之資守盈成之業厲精圖治宵衣旰食凡所謂敬天

之事憂民之政無不盡心於其間而治效猶邈闕政
滋多民怨於下而惠澤愈鬱天怒於上而災異疊見
歷觀前古之史災異之多且大未有甚於此時而亦
未有甚於近年冬雷地震無雪無冰冬暖如春春寒
如冬陰陽反序天氣乖舛蕝隆為旱水澤枯竭薰蒸
為疫人畜殆盡赤子枕藉牛羊斃踣國醫不能用技
術王祭無以供犧牲迫切之災將剝於膚嗚呼此天
所以大警動於

殿下而欲保護之全安之則

殿下所以積誠動天修德勝災之實宜如何用其力

耶臣等伏見

殿下遇災以來孜孜汲汲思革弊

致延訪大臣發罪已之教懲既往之愆臣等伏讀

教書感激揮涕奮不自己以 殿下有堯舜之心

而羣臣不能導 殿下爲堯舜之理使斯民不得

被堯舜之澤此固今日羣臣之罪也然以 殿下

恐懼修省之道引咎責躬之實推之袞職之闕亦豈

無可言者耶臣等敢以 殿下今日之所當務者

十事爲獻惟 殿下留心焉夫所謂十事者其綱

一其目九今誠能從事於一綱而盡其道則所謂九

目者特其舉措之具施爲之方耳何患於難行哉何

謂一綱曰致中和也子思曰喜怒哀樂之未發謂之

中發而皆中節謂之和中也者天下之大本也和也者天下之達道也致中和天地位焉萬物育焉夫道之大原出於天而具於心散於萬事通天地而一理盡萬物而一體未發之前至靜至正而無所偏倚者中之體也已發之際品節不差而無所乖戾者和之用也致之去者推之以極其至也存天理於不覩不聞之頃遏人欲於莫見莫顯之際大本立而達道行體用合而物我一由是薰蒸透徹洋溢流通由身而家而國而天下而天地之所以爲天地萬物之所以爲萬物無不安其所而遂其生此堯舜禹湯文武之

君所以參天地贊化育俯仰無媿麒麟遊其藪鳳凰
鳴于岡而無妖孽災變之作也夫以

殿下之明

而猶有今日之憂者無他

聖學之功有未盡而

中和之致有未極也進言者有曰

聖學既已高

明矣若無復屑意於問學而可者噫爲是言者惟知
以經史間涉獵之功贊

殿下之學而不以堯舜

三王之道望於

殿下也惟古之聖帝明王知道

之無時不然故無一時而非學知道之無物不有故
無一事而非學以至盤盂有銘几杖有戒瞽御之箴
瞽史之諷凡所以操存此心培養德性者無所不用

其至矣今也無此數事惟賢士大夫之得近清光講
論規戒者自 經筵數刻之外無聞而進講之書又

非二帝三王授受心法之旨孔孟程朱傳道講學之
要則 聖學之得於 經筵者恐未足以日進乎

高明之域矣自此之外深居 九重之內左右燕閑
之侍惟宦官宮妾之輩無芝蘭俱化之益有一曝十
寒之懼則當此之時 聖學之所以用功者臣等

未得而知之也竊恐淵蛸蟻蘖之中虛明應物之地
存養省察之功有所未至而大本之立未能堅確故
達道之行多所壅閼由是宮禁不得有所閑而嚴紀

網不得有所賴而立人材之辨或至於混祭祀之謹
或至於瀆民隱欲恤而不恤教化欲明而不明名為
慎刑而寬獄尚多名為禁奢而弊習自若名為納諫
而直言者不用自末而求本沿流而溯源 殿下
寧不於此而矍然惕然回心而嚮道乎伏願 殿
下知 聖學之未至加精一之真功不責於人而
責於己不求諸外而求諸內常從事於戒慎恐懼毋
自欺謹其獨之實則凡日用動靜語默之間萬事萬
物之紛綸酬酢無所往而非 聖學用功之地而
中和之極功可以馴致矣其綱旣舉其目自張尚安

有民怨天怒而災變之爲憂哉臣等請陳其九目惟
聖明留意焉蓋宮禁不可不嚴也傳曰家齊而國治
其家不可齊而能治其國者無之故王化之本在於
宮禁宮禁不肅則邪徑通於內外正路塞於朝廷公
論阻礙而不行邪僻眩惑而售奸亂亡於斯莫救矣
蓋君臣上下之際親戚內外之間其情意之往來流
通猶血氣之升降流行於一身上下之內此理之自
然有不得壅闕於其間也然氣血之行順其道而行
則和暢安順四體康寧失其道而行則乖舛瘀滯百
病層出上下內外情意之通由正路而行則光明正

大朝廷和泰由邪徑而行則暗昧回譎矯僞作孽國家之安危於斯判矣理勢之必然者既可易知往事之已然者亦多明驗而時君世主率皆以外廷之相與者踈而外之循例相接而已以宮闈之攀緣者親而信之倚任聽從是何心哉外廷之臣不能以誠信感君以致阻碍固其罪也攀緣之徒亦豈誠心愛君者乎是欲憑藉恩寵求濟其私耳且其初心只欲求濟其私耳非必預畜亂國之謀也利害之際事勢迫蹙則何事不可忍爲自己外求士林間禍敗之巨者無不由是而翻覆故事關宮闈莫不寒心

幾下

無意懲父及或崇長不肯革前弊禍亂何時而止
乎除官拜職自有公論責在銓衡而特命或出於物
情之外聽訟理寃自有情實任在有司而判斷或及
於細瑣之事羣聽疑怪莫知端倪涖涖不絕則將至
滔天炎炎不滅則終至燎原可不戒哉朝廷之上有
腹心之臣有耳目之官有喉舌之地腹心可以謀議
耳目可以聞見喉舌可以出納由是而謀議由是而
聞見由是而出納則朝廷之是非人物之賢否庶政
之利害其真偽莫得以眩亂至於號令之際事正言
順人心咸服無所惶惑而中和可致災變可消矣紀

網不可不正也古之爲政者必先正其體要紀綱是也書曰若網在綱有條而不紊夫以四海之廣兆民之衆莫不有嗜慾莫不有智力苟無總攝而歸之於一則相攘相奪氓氓焚焚而禍亂作矣故自農工商賈府吏胥徒之賤其上爲士又其上爲大夫又其上爲卿爲公而後一人加焉使之上下相維貴賤相屬而又爲之禮以次其先後爲之政以率其怠倦爲之法以守其制度皆所以夾輔紀綱之具也雖然紀綱不能以自立必待賢者而後立紀綱不能以自行必待公道而後行夫賢者之所存隱然有虎豹在山之

勢公道之所揭赫然如日月中天之明於狸狌魄而
遁藏陰翳望景而披釋嗚呼此宰相臺諫之責其機
則在於人主之一心詩曰之綱之紀燕及朋友百辟
卿士媚于天子不懈于位民之攸暨此言紀綱之責
在於大臣也又曰勉勉我王綱紀四方此言紀綱之
責在於君也夫如是然後國家安如盤石熾如炎火
而無土崩瓦解之勢矣今也庶獄庶慎之煩瑣皆勤
於聖慮簿書期會之猥細或出於宸斷是
人主而侵有司之職矣以因循爲輔相之得體以含
糊爲享福之大智不事其所當爲之事是大臣隳經

濟之任矣是以紀綱之不振公道之不行其責不得不歸於臺諫臺諫之任亦重矣然而止於補闕拾遺耳激濁揚清耳其於本源無如之何也則私情勝而公道滅法令壞而百司慢沓直以解之請託以紊之貨賂以撓之奸猾以亂之由是一國之紀綱幾於蕩悉發下雖欲改紀其政漠然不相應而駸駸乎淪胥之域此天所以愛之惜之大警動而不已者也孟子曰行有不得反求諸己伏願發下鑑盤庚有條之言法文王勉勉之道反求而致中和之功紀綱不期正而自正股肱同德公道大行則民怨可熄

而和氣可召矣人材不可不辨也書曰惟治亂在庶
官官不及私昵惟其賢爵罔及惡德惟其能是故人
材之辨有國之先務也然君子固自以爲君子而以
小人爲小人小人亦自以爲君子而以君子爲小人
各自爲是互相排擯則爲人君者莫得分其邪正矣
昔京房問於元帝曰幽厲之君何以危曰所任者巧
佞曰知其巧佞而用之耶曰賢之曰然則今何以知
其不賢乎曰以其時亂而君危知之曰任賢必治任
不肖必亂必然之理也幽厲何不覺悟而更求賢曷
爲卒任不肖以至於是曰臨亂之君各賢其臣也又

聞李德裕言于文宗曰致理之要在於辨羣臣之邪正邪正二者勢不相容正人指邪人爲邪邪人指正人爲邪人主之辨甚難也是故成敗之迹在古已驗則雖愚夫皆知其善惡而心術之用在今未彰則雖智者莫能辨其邪正矣况擁之所在勢之所歸則人雖知之而莫敢言之也雖然人心難誣公論難杜矯僞之迹容或蔽於一人之心鑑而肺肝之靈自難遁於十目之所視故孟子曰左右皆曰賢未可也諸大夫皆曰賢未可也國人皆曰賢然後用之左右皆曰不可勿聽諸大夫皆曰不可勿聽國人皆曰不可然

後去之昔齊威王謂阿大夫曰自子之守阿也譽言日至是善事吾左右也謂即墨大夫曰自子之居即墨也毀言日至是不事我左右也宋仁宗問可爲相者於王素素曰宦官宮妾不知姓名者可充其選然則左右近臣之言固未可信必諸大夫之言然後始可信也然不必遠徵前代姑以耳目所經之事言之二十年來朝廷士林每分朋黨隨權曰勢互相勝敗勝者爲君子敗者爲小人附已者是之異已者非之旣以爲君子則諸大夫同然是之旣以爲小人則諸大夫同然非之是豈盡昏愚而莫辨者哉率皆畏禍

而附勢也有所論執則大臣率六曹言官合兩司當
此之時 殿下豈不以爲物情如此哉諸大夫之
言容有不可信者如此故至於國人皆以爲然然後
其論公矣古人云謀從衆則合天心爲人君固當大
開言路使國人無大小貴賤皆得進其言雖有所犯
觸亦不加罪則公論始可聞也物情始可知也雖然
孟子必曰國人皆曰賢察之見賢焉然後用之國人
皆曰不可察之見不可焉然後去之必察之於已親
見其賢否之實然後始決其用捨之分則於賢者知
之深而任之重不才者不得以幸進矣故書曰庶言

同則繹孔子曰衆好之必察焉衆惡之必察焉然則必學問高明心德昭朗如鑑之空如水之澄然後入心之邪正曲直莫得以遁其毫髮矣若在我者不能昭明澄澈而遽欲察之於庶言之外則或不免偏見之失當反不如衆論之多中矣故或精鑑於己或博采於人内外交證權衡得宜然後庶幾不失其實矣近者賢邪稍分朝廷稍安但可因是而善持豈容更鼓其異說然人心之操舍不常世道之翻覆無窮於此而尤加省念絕偏黨之私而守進退之公則可以致中和而天人胥悅災不爲災矣祭祀不可不謹也

易之萃曰王假有廟祭祀之報本於人心聖人制禮以成其德羣生至衆也而可一其歸仰人心莫知其鄉也而能致其誠敬鬼神之不可度也而能致其來格萃合人心總攝衆志之道非一而其至大莫過於宗廟故事死如事生事亡如事存孝之至也至於社稷以萬物居於土食乎穀也釋奠釋采以先聖先師爲民立教也山川羣神以禦災捍患有功於民也城隍厲壇所以致發告而秩無文也故國之大事在祀而祀神之道又在於誠敬也我國祀典非不備矣殿下孝誠非不至矣而齋廬之弊陋祭服之不淨莫

甚於此時無以潔躬而清神揭虔而起敬京師且然
況在僻縣窮邑乎其爲慢神極矣然此則有司者之
罪也孔子曰吾不與祭如不祭蓋有其誠則有其神
無其誠則無其神此古之聖人所以祭必與祭而致
其如在之誠也近來宗廟大享例爲攝行其攝也
亦不以大臣奉先敬神之道恐有所未盡也 殿

下甯時憂勤三十有餘年豈無 聖躬之愆衛乎

祈寒暑雨固難躬行自餘節候和適氣體康寧之時
若無大故親享之禮不宜有闕也昔鼯鼠食郊牛之
角春秋示戒況今三牲告災日以就盡神之譴怒可

謂峻且切矣伏願

殿下明王假之義致如在之

誠躬率而先之肅雍以將之則百官執事之在駿奔之列者皆將不動而敬不言而信不怒而威於鈇鉞而向之所謂齋廬祭服之類自不容於不謹也記曰明乎郊社之禮禘嘗之義治國其如視諸掌乎此乃仁孝誠敬之至體信達順之極天人交孚鬼神降福而災不爲災矣民隱不可不恤也書曰民惟邦本本固邦寧傳曰民依於國國依於民不愛其民而能保其國者未之有也是故先王愛之如已保之如子瘁痾疾痛舉切於吾身鰥寡孤獨必先於撫養制其田

里教之樹畜使之仰足以事父母俯足以畜妻子樂
歲終身飽凶年免於死亡此王政之本也伏見

殿下愛民之誠非不至矣重民之政非不備矣而近
來水旱爲災饑饉荐臻力本之民終歲勤動而不能
救一朝溝壑之命中人之家十室九空轉徙之氓何
以聊生則矜恤賑貸之方當如救焚拯溺之不暇今
之字牧之官鮮有慈祥惻怛之偉率多貪暴無厭之
流催科辦急思眩幹能妻妾服食思極侈豐所事權
貴悅於貨賂則思充其欲所識窮乏之德於周給則思
得其心巧作名色吞噬腴削粒米狼戾於公廩杼柚

空竭於閭里其他邊將之剗剗諸司之侵漁若此之類所在皆然使

殿下之赤子一困於天災再困

於苛政厥聲嗷嗷無所控告非特此也步兵水軍大
疲於土木選上皂隸之困於重斂傾財破產鬻盡田
土以應其役及其還家無以爲業則相率流亡害及
九族隣比怨氣極天如此而欲望和氣之感雨暘之
調豈不遠哉昔漢宣帝曰民所以安其田里而無嘆
息愁恨之聲者政平訟理也與我共此者其惟良二
千石乎夫親民之官莫重於守令其選不可不謹人
君以父母斯民之心舉赤子之命不付之慈祥之吏

而付之虎狼之口豈所忍哉

祖宗薦舉之法其慮

甚遠朝廷舉而行之其意甚義而卿大夫不體

聖心徇私害公冒薦庸鄙者毀良法夫薦者之薦此人非爲此人也將以自利也然則割剥軍民者非守令邊將之割剥也乃朝廷之割剥也朝廷者四方之本未有不正其本而能治其末者也朝廷有庸耻而除徵剥之弊良法無所碍而得選任之公則妄幾實惠下究而生民蘇息和氣可召矣教化不可不明也治國之道有二焉刑政與教化而已也刑政所以制之於外也教化所以感之於心也刑政以制之則民

免而無耻教化以感之則有耻而且格夫教化之爲
道也非以其人心之所無者強而行之袁羹之德各
自具足故因其人之所固有者而導之也然不能躬
行以率之則無以使人有所觀感而興起也近年以
來教化不明士習不正節義廉耻掃地盡矣人心日
趨於偷薄不知名節行檢之可貴唯阿諛軟熟奔競
附會之爲務權之所在望風而靡然勢之所歸見幾
而先趨罔上附下之風興背公謀利之弊作頃者之
事蓋已驗矣士習旣失風俗隨變三綱墜地人倫之
變相繼而起子弑父奴戕主妻殺夫其變有甚於天

之災變至此而天理滅人道盡將何以爲國乎蓋人
心之不正由於教化之不明教化之不明由於導率
之失其道耳三代之學皆所以明人倫也人倫明於
上小民親於下是皆本之人君躬行心得之餘非假
於外也今者學校之政不本於人倫勸勵之方只在
於記誦詞章之末記誦詞章雖不可廢化民成俗之
本實不在是伏願
 殿下反諸已窮其源盡人倫
之道立教化之本則感化之速有同於風草而士習
自正民德自厚致和弭災之道孰加於此乎刑獄不
可不慎也天之於萬物雨露以生之霜雪以殺之無

非仁也聖人之於萬民德禮以養之刑罰以威之無
非教也蚩蚩之氓或動於利欲或陷於過誤或入於
誣罔或涉於連逮事狀千變情偽萬端非至明無以
得其情非至公無以服其心死者不可復生斷者不
可復續其不可輕也如此

殿下體天地之仁推

生物之心惻念無辜親覽獄辭三覆死囚欽恤之意
至矣而聽斷之吏或情私而不公或才暗而不明殘
民之肌膚決民之性命理直者未暴其情情輕者多
入於重含冤抱痛詎忍言哉至如詔獄之設無異親
問所以審克冤枉而今也入乎詔獄者無計自直則

例爲首服以僥倖

聖仁之特原誠可哀憫數十

年來士林之禍反覆屢起士大夫殞越於刑戮者曾
不知其幾人也若其罪負關重情狀著白玉法所不
可貸者則已矣其間豈無非其罪而被重典抱深冤
於冥冥之中者乎冤氣結而不散者多則傷和召災
未必不由於此帝王仁恤之典固宜無間於死生平
反犴獄伸雪幽冤是亦弭災之一道也奢侈不可不
禁也甚矣奢侈之爲害也天生百物人取而用之人
者百物之主也人有耳目口鼻之欲而其欲無窮物
有山林川澤之生而其生有限欲之無窮也以天下

奉一人而未周生之有限也以一人竭天下而不足
殄天物而天怒剥民膏而民怨積怨積怒而不知已
則爭奪起而亂亡隨之矣近來王子女第宅務極宏
大爭尚華侈毀撤民家橫亘閭閻高棟層櫟侔擬宮
闕以至婚姻之禮車服什器之具莫不極其華靡士
大夫之家又從而慕效室屋之大婚禮之侈傷財僭
分罔有紀極弊將難救言官每以土木之弊論列不
已而殿下聞之藐藐者必以爲士大夫始以布
衣起於草萊無高會積累之業猶且大起室屋極備
婚禮況以堂堂一國之君有子女顧不能崇室居而

備婚禮乎是則其罪固在於士大夫矣若以人君自修之道言之則固宜澄源於上而式刑於下也又有一說焉以奢侈奉其子女者所以愛其子女也然其所以愛之者適所以害之也大抵儉約而獲福奢泰而招損天之理也以今所見而言之巨室纔成拘忌輒生避居委巷朱門空鎖纔易一世則便成廢宅子孫之保有者無幾是費有盡之財營無益之宇也往者有宗室孝寧大君性頗謙素厭處華室嘗構草屋恒處其中終能壽延九廢子孫蕃衍此近事之明驗也今之奢侈習固百弊之源而其源在於宮禁邦本之

凋瘵府庫之虛竭皆由於此亦足以起怨而致災伏
惟 殿下深省焉諫諍不可不納也人主不能自

聰必合衆聽而爲聰不能自明必合衆視而爲明古
之聖王其聰明思慮固非庸衆人所能助其一端而
猶且樂受人之諫者嗜善無窮也 殿下躬上聖

之資有好問之德凡有論列闕失受以爲過而自責
成湯之弗弗無以加矣頃年以來從諫之美寔不如
初訑訑之色或形於外進言之際但示優容而無採
用之實遇災責躬專事虛文而無求言之 旨無乃
有厭聞直言吝於改過之意乎非特此也臺諫如有

論執稍堅違忤 上旨者則輒出 特命遽遷他職
雖無形迹可以指論物情或不能無疑也頃者求言
之後上書者偶觸忌諱輒欲加罪至命三省而推鞠
或有系賤而言事者以爲欲亂朝廷者教之是以求
言爲罪於國中也各陳所懷容有不當之論人君但
當擇其善而用之而已豈宜加怒於妄言之人乎諫
者非人臣之利乃國家之福也苟以言被罪則誰肯
犯雷霆之威進無益之言乎頃者國柄落於奸手危
亡在於朝夕人莫敢進一言以觸之者以此也當此
之時有能斥言其情狀者則非徒觸奸兇之鋒亦且

遭逆鱗之怒其爲粉身糜骨斷無疑矣此在

聖

鑑宜少悔悟而病源猶存物情之鬱災異之來恐由是也大抵凡以闕失進諫者非欲彰君父之過將以責備於

聖德也伏惟

陛下更加省念焉

臣

等伏見

陛下有願治之心而治道不成有憂民

之心而民瘼弗除有敬天之心而天譴日至宥密之居每警乎側身德音之發多形於憂慄而不能有所補其視一世雖曰治平無事而其實有不測之憂難救之患不伏於冥冥而著於昭昭大臣置之尋常而無建明小臣相視怠緩而不修舉卒補過時架漏度

日以臣等私憂過計畫度夜思庶有以少補涓埃之
萬一不敢遠言不敢激言而以所謂十事者歷指而
言之此皆今日之急務黼展之切戒也小臣之罪不
暇引大臣之失不暇舉而必欲責望於聖躬者
誠以大本之所在達道之所由捨此而求治無是理
也伏願 殿下盡心於一綱盡道於九目日進
聖學以救時弊以應天譴 宗社幸甚臣等無任激
切屏營之至謹昧死以聞

晦齋先生集卷之十三

拾遺狀劄

辛丑季夏十六日呈辭

時爲副提學在洛

右謹啓臣老母遠在南涯七百里外素多疾病作痛無時臣不忍遠離游宦前者屢乞外補庶酬終養之願未閱數歲旋即被召特授京職臣實庸陋別無寸識濫荷寵眷之隆顧之涓埃之補去年秋陳乞歸養未蒙允許惶恐不敢更辭悶默在列荏苒周歲今則母年七十有三羸病轉深氣力日耗行動須人扶飲食不識味近日受由歸省尚未解職不可久

留母子涕泣相別痛念餘齡之無多猶幸逮養之有日臣有身一人今爲集慶殿叅奉兄弟俱在官衰病之親傍無奉養之人乞依常典歸養

壬寅九月呈辭

時以大司憲受暇在鄉

右謹啓臣猥以駑劣遭遇

聖明數年以來濫荷

寵擢叨冒非分又令率母來京

寵命非常曠世稀

聞隕首剗心豈足上報今又謬蒙

睿眷特授風憲

之職

聖諭丁寧責任非輕臣感激

恩遇思竭

微忠庶效涓埃之補而第緣老母遠在南涯受暇來省今年春夏之間腰痛病得發累旬沉綿飲食全減

氣力頓耗近日又發風眩之疾精神昏憤日就羸困
奄奄氣息未保朝暮人子之情不忍遠離竊自惟念
國恩未報親病已深進退狼狽日夜憂悶雖切補袞
之誠已多曠職之日無任惶懼懇迫之至

甲辰秋七月呈辭

右謹啓本月初八日祇受同副承旨書狀內以臣爲
漢城府判尹本府辭訟煩劇斯遠乘駟上來事有
旨臣奉承 隆旨震惶罔措伏念臣以駑劣濫荷

寵私

天恩罔極不知所喻義當即日奔趨上道

詣 闕謝

恩而臣自今年四月上氣與勞熱諸證

氣發心膈痞悶食飲不下元氣虛耗日就羸瘁又自
六月之初手足背及髀裏瘡腫大發經朔治療餘毒未
殄差復難期又以老母年迫八十宿病轉劇常在床
褥風眩喘急膏滿氣促精神昏憤言語錯誤奄奄危
迫朝不保暮人子迫切之情不忍一日遠離臣竊自
傷猥以庸陋遭遇

聖明寵渥濫分常懷糜粉之

志未效涓埃之報矧今 恩命及門 睿眷彌隆非

不思趨赴謝 恩一望 清光庶復陳乞歸養以遂

私願於臣之情義兩全不幸疾疢纏身親病又篤末
由承 命奔趨伏俟違慢之誅瞻望 北闕神魂飛

馳無任惶懼隕越之至

甲辰秋九月呈辭

右謹啓本月十六日祇受右承旨書狀內以臣爲世子左賓客世子時方數開書筵斯速乘駟上來事有旨臣承命震慄靡所自容伏念臣以庸劣濫被寵眷數月之間至於再降召命感激恩遇不知報塞臣前者承漢城府判尹之命臣於其時方患瘡腫未克趨朝而老母又年迫八十宿病轉劇遠離從宦情所不忍披瀝情悃懇辭恩命獲蒙聖慈優容曲賜矜從溫諭丁寧又有補外之教

使臣得遂終養之願奉戴綸音不能自己今忽不
意又有召旨諭以東宮講學之勤使勿遲稽

睿眷殊隆至於此極省循難堪罔知攸措臣竊念方
今世子學問高明德業日就仁孝之聞洽於朝野
宗社生民之福實繫於此當此之時特召臣於千
里授以勸講之職臣雖學術鹵莽無以報稱豈不願
一侍講席展竭愚衷庶幾裨補萬一於緝熙之學第
緣母病沉綿不忍遠離而君命再下固辭不就於
義亦未安庶得一詣闕庭復陳情懇承命以來
日夜兢悚奔馳上道臣久病之餘身氣虛弱未得蘇

復道路勞傷風邪乘之軍威地來到傷寒病得發頭
目眩痛心胃煩悶寒熱交作食飲不下累日治療日
向困瘁在道淹滯久稽趨詣孤負眷遇之隆難逃
逋慢之誅伏惟 殿下天地父母哀而憐之 俯
察葵藿之誠 特垂生成之 恩許臣解官治疾假
以數月庶得治調保全殘軀以效犬馬之力於異日
臣無任感 恩戀 闕惶懼隕越之至

甲辰十一月呈辭

右謹啓臣去八月蒙 恩授知中樞府事兼世子左
副賓客祇奉 召旨諭以東宮講學之勤使勿遲

稽承 命震悚罔知攸措臣久病未蘇身氣羸弱勉
強奔馳中路寒疾暴作證勢緊急未克趨朝謝 恩
披瀝情悃干冒 宸嚴惟願乞身治疾以保危喘未
蒙 允許溫諭丁寧使臣調保上來感激 九重隆
眷自憫一身嬰疾瞻望 北闕涕泗交頤庶得治療
病軀竢其稍蘇趨詣謝 恩日夜期望而臣病彌留
久未差復元氣虛弱日益羸瘁加以背寒如冰在背
渾身痼冷有時心腹脹痛胃膈痞悶又自今年夏月
四肢瘡腫多發連綿不絕今又於两手及腰髀腫多
發痛轉側甚艱經朔治療尚未差復過服冷藥致傷

脾胃久不思食瘦弱日甚心氣虛困胃滿喘急病勢
沉重多方救療略不見效臣竊自念猥以無狀濫荷
寵渥福過災生以至於此賓客職任緊重不可久曠
除授又經三朔召命累下留滯至今未得詣闕
謝恩下負夙心上孤聖眷殊失人臣之禮伏
俟違慢之誅儻蒙聖慈優容憫臣沉疴之久
特垂生成之恩許臣解官治疾假以數月庶得治
調保全殘軀以效犬馬之力於異日臣無任感恩
戀闕惶懼隕越之至

甲辰十一月待罪狀

右謹啓臣病伏南涯久未趨朝徒結九重之戀不
意奄聞大行大王諱音北望驚摧號踊無地伏
念臣以庸陋無堪濫荷國恩玷冒朝列庶竭愚忠
以效涓埃而不幸自今年夏月以及秋冬疾疢沉綿
瘡腫繼發身氣羸弱風邪又乘諸疾交作再奉召
旨未克趨詣謝恩惶恐罔措具狀乞免惟願解職
治調幸得未死庶獲一詣闕庭復望天顏豈
知昊天不弔奄忽至此白首病臣未畢糜軀之志永
抱窮天之痛大行大王臨御歲久仁深澤厚奉
諱之日遐邇崩心含生之類莫不奔走悲號凡在臣

子曷勝隕裂臣抱病嶺外伏枕呻吟僅存形息雖切
攀號之痛莫伸奔問之誠罪當萬死仰天摧咽不知
所言臣無任哀惶痛迫之至俯伏待罪

乙巳閏正月待罪狀

右謹啓臣病伏南涯始聞

大行大王諱音迫於

疾篤未能奔趨攀號臣子之義已缺仰天摧咽無地
自容猶可以慰此心者庶得賴天之靈調保病軀扶
曳就道奔及梓宮在殯之時一展號哭以紓罔極
之痛豈知臣病沉綿至於此極日月不居奄及五月
之期瞻望北闕不勝隕裂惟欲勉強與疾奔趨久

病羸弱身氣虛損喘促心煩若復勞動脩程恐至殞
斃於中道萬計中阻一無所遂今則永遷之禮祇隔
數日扣地叫天無所逮及懷痛窮天死不瞑目爲人
臣而遇君父之喪不能奔哭大節已虧罪應萬死
臣無任哀惶隕越之至痛哭流涕俯伏待罪

乙巳十二月呈辭

右謹啓臣有老母遠在南涯年迫八十又多疾病常
在牀褥人子之情不忍遠離從官往在 中宗朝

陳乞歸養至于再三伏蒙

聖慈憫臣情事懇迫

特許外補便養尋又除本道監司俾遂烏烏之情

聖恩罔極糜粉莫酬追念及此未嘗不感激墮淚今
則母之衰病彌篤日迫西山精神昏憤不識人事近
日寒疾又作咳逆胃滿奄奄氣息朝不保夕臣之迫
切之情自有不能已者今者主上幼冲朝廷多
事詔使又至正當羣下協心匪躬之時臣忝居朝
列義不可辭退第以母病危迫不得已呈辭心甚未
安至爲惶恐竊自惟念主上方今專意學問輔
養之事甚重臣帶勸講之職日夜思所以展竭微忠
裨補聖學以爲宗社無疆之福未嘗斯須忘
于心今適以日寒停經遂臣得以此時歸省病母

幸得賴天之靈母病稍愈來春日和開講時庶及還
朝入侍 經幄陳說道義以輔 聖德此臣之志
也臣之願也今當遠離 闕下不勝區區犬馬之誠
敢啓

侍講院劄字

壬午二月
時爲說書

伏以臣等俱以庸資待罪 東宮僚屬長思職責所
居夙夜兢惕罔知所爲蓋 世子國之本上有 宗
廟社稷之重下有百官萬民之戴前有 祖宗創業
之艱後有子孫長久之計而其安危離合之幾存亡
治亂之端一繫於輔養之職得失如何然則其爲責

可謂至重至大不可一日輕且忽也甚明今我世
子雖曰岐嶷夙成睿質異凡然年尚幼少德性未定
若於是時輔養得其方而又盡其道則涵養變化可
與爲堯舜之君可與爲禹湯文武周公之聖宗社
生靈之福於是而釀成矣如或失其方或未盡其道
則反是而其卒至於敗度悖禮之域亦未可知矣此
臣等所以備員僚屬不敢一日自安者也頃者

殿下慮其徒事講讀之間未有優游規諷之益使賓
客僚屬從容久侍不時接見終日不退至於師傅貳
師則會講前後又別更迭進見以保翼之甚盛意也

而輔養之道可謂得其方矣然考之古禮亦有所未盡焉者蓋古之輔翼太子也太傅在前少傅在後八則有保出則有師保以保其身體傳以傳之德義師以導之教訓以養成其德令之師傅貳師則古之太師太傅少傅之職也而其與世子相接輔養之時比古極疎已乖昔人朝夕承弼左右輔導之意至於會講則又非徒講讀而已所以使世子習其升降揖讓之禮發其隆師敬傳尊德樂義之心尤不可一月或廢也近者連月停會講似甚未安昨又以賓客皆隨駕遂停不行臣等竊念國家宗社生靈之計

至大至急者莫如輔翼儲副今間一有事故書筵會講輒命停之輔養之職似不重且專焉臣等竊惑焉蓋殿下之意必以爲世子年少學問尚蚤雖時或廢未至爲害然古語云少成若天性習慣如自然蓋人之幼也知思未有所主左右前後皆得正人格言至論日陳於前則其熏聒成就必有日新又新之美故曰大學之道以豫爲先若爲之不豫及其稍長私意偏好生於內衆口辯言鑠於外雖欲純完不可得也是故古之王者太子乃生固舉以禮有司齋肅端冕見之南郊過闕則下過廟則趨自爲赤子而

教固已行矣孩提有識三公三少固明孝仁禮義以導習之逐去邪人不使見惡行於是妙選端方正直之士孝弟博聞有道術者使與太子居處出入以衛翊之蓋不以其蒙幼之時而忽其教養之方也矧今世子年在入學學問日進又非如赤子孩提之比其教諭輔翼之道不可一日慢也停講之日則世子在宮中所與居處從容燕遊者不過宮人宦侍而已所見未必皆正事所聞未必皆正言夫以年寢長學問日進知漸達氣習易移之時而與宮人宦侍相處戲遊之日多接師傅賓客雍容講劇之時少此臣等

所深慮者也伏願

殿下常留 睿念今後會講

時非有大事必使行之至於賓客勿差異事以至廢講且得專精致志庶幾有裨輔養取進止

兩司劄字

丁亥秋八月
時爲掌令

伏以 臣等論光弼李沆伏閣累日面啓再三 天

聽邈然公論愈鬱臣等不勝缺望大抵宰相臺諫各有其職宰相當以大公至正爲心平庶政理陰陽爲本不宜少有偏黨之私臺諫固以正君匡國爲念繩愆糾謬爲事面折廷爭不顧其身折檻牽裾不知其過何敢避詭激之嫌故曰宰相尊行其道臺諫卑行

其言其職雖殊其所以贊襄君德調劑治道則一也
若爲宰相者或未免與臺諫爭輕重之勢必欲摧抑
以自取重則重者益重而必至於壅蔽輕者益輕而
必至於苟容爲國計者豈不寒心沉之言在於重大
臣而先欲卑抑臺諫使無激昂之節俛首喪氣苟循
大臣之意不幾於一言而喪邦者乎 殿下聖學

高明洞貫古今於沉之言固已深燭其邪妄猶病大
臣之交相辭避未敢明正其罪臣等竊惑焉臺諫彈
一宰臣秉鈞大臣托以引嫌朋比相援杜沮公論使
不得伸其直脅持君上使不得有所進退嗚呼此豈

盛世之事光弼攬沈言爲己意斥臺諫爲詭激排擯
公論營謀一人決非社稷之計自古壅蔽之禍起於
大臣陰斥異己惟取苟合彈駁無異鷹犬顧指有同
奴隸雖有指鹿之奸誰敢言者敢攻人主不忤權臣
傳堯俞之言誠有激而云也公論之在朝廷猶人身
之有血氣血氣有滯百脉不順心腹痞結必發踈盪
之疾公論一挫士氣沮喪庶事頽墮國勢委靡不可
復振是正亂亡之兆伏願 殿下洞察安危之幾
亟奮雷霆之斷策免光弼以杜禍漸廢黜李沆以正
其罪 宗社幸甚

時李沆論臺諫有趙光祖餘習
請禁之先生上劄極言其非

司憲府制字

壬寅秋時
爲大司憲

伏以人君之德莫大於至誠誠之道可以動天地感鬼神而況於人乎古之聖王垂拱臨朝不動聲色而羣臣協恭萬邦作孚者誠而已矣夫誠者天之道也誠之者人之道也以人而合天非真積力久不可得然求其用力之地不過曰不欺也無妄也悠久不息也何謂不欺戒慎不睹恐懼不聞是也何謂無妄就於真實而不雜以虛僞是也何謂不息終始惟一時乃日新是也此三者有一之未盡焉則不可謂之誠矣姑舉其槩言之修飾於大庭廣衆之中而放肆於

深宮燕閑之地矯揉於親近君子之際而發怒於昵
比小人之時此欺也非誠也實奢而文之以儉實暴
而掩之以仁所樂者諛佞而外爲納諫之名所受者
奸邪而謬爲敬賢之貌此妄也非誠也敬畏未幾而
怠忽繼之儉約未幾而侈泰隨之勤怠之靡常而暴
寒之不一凡此者皆非誠也易曰鶴鳴在陰其子和
之言其應之速也詩曰鼓鐘于宮聲聞于外言其實
之易彰也苟意念少差則觀感立異豈不甚可畏哉
臣等伏見 殿下臨御以來寅畏小心恭儉愛民
始終無貳可謂誠矣然而上無以格天而災沴存臻

下無以感人而奸僞日滋治效寒泯而不著風教頽
剝而莫救生民日以困窮士節日以消沮風俗日以
壞敗至有逆天滅倫之變相繼而起民彞泯絕危亂
將至

聖治之下有可痛哭者非一其所以致此
者豈無其由耶臣等竊思之無乃虛明應物之地天
理有未純人欲有未盡好善而不能如好好色惡惡
而不能如惡惡臭取舍差謬於一念之微符驗暴著
於萬目之視乃至於是耶夫好善而不誠故賢非不
仁而終或廢斥惡惡而不誠故邪非不去而旋被
寵眷數十年來摺紳之禍輾轉相因以至斷傷國脉

消喪元氣者皆由於此也夫好惡不誠於中故進退
無常於外奸邪之徒投間眩惑顛倒是非貨亂邪正
者是皆窺 聖心之不誠而然也變故以來士氣
摧喪人心頹墮振之不起令之不信大小臣僚憤見
慘禍惟持祿容身之是務無展懷盡節之爲念嗚呼
是豈細故耶近者羣凶屏除朝政一新 上之奮厲
悔悟思革前弊改紀其政者非不至矣然而赤心未
推於下羣情不孚於上 上有善風化之教下不將
順而空言無施 上有憂災異之念言昔年之有應
物情疑懼而羣議囂囂此雖罪在羣下之不信

聖明亦由

聖心之至誠未著而然也夫所謂至

誠之德者不動而敬不言而信實於中而形變於外者也上有善政善教而下不從化者皆以誠之未至也夫明有未照故誠有不至明無不盡則誠無不至矣明之之要亦在於窮理盡心而已伏願

殿下

加精一之功致明誠之力凡是非邪正之際察之必精辨之必審以實其好惡之心好賢則誠以好之而任之不貳惡邪則誠以惡之而去之勿疑不欺於隱暗之地無妄於意念之微表裏惟一終始無間以感羣情以格天心宗社幸甚

乙巳秋劄字

伏以今者遭國家否運 二聖相繼賓天朝野摧痛
遑遑罔措猶可以慰人心安 宗社者獨有賴於
慈殿之明斷輔臣之盡忠臺諫侍從之盡職而已當
此之時治亂安危之幾繫於 慈殿之一念凡政令
刑賞之施一循公議而不置私意於其間則朝廷正
而紀綱立人心悅服而治化可期矣萬一九重之內
隱微之際有纖毫偏私之累則符驗之著於外者自
有不可掩而羣臣解體國事自非終至於不可救可
不戒哉自古幼主在位母后聽政或不能全德而致

禍亂者多矣其所以至此者蓋有二焉曰信讒邪也
私戚屬也讒邪陰肆眩惑而顛倒是非戚里恃寵縱
恣而干政亂紀未有不至於喪亡者甚可懼也若欲
保宗社而全骨肉之恩莫如杜其邪徑不借以權勢
也如或不然其所以寵之者乃所以禍之也方今
慈殿睿聖聰斷光明前古所無豈有此慮然先事之
戒不可無禍亂之漸不可不察三代以下獨稱宣仁
皇后爲女中堯舜者以其信任賢相去邪勿疑而不
施私恩也太后從父高遵裕坐西征失律抵罪蔡確
思求媚於太后而自固請復其官太后曰遵裕靈武

之役塗炭百萬先帝中夜得報起環榻而行徹朝不
寐自是驚悸馴致大故禍由遵裕得免刑誅幸矣先
帝肉未冷吾何敢顧私恩而違天下之公議乎確悚
慄而退其至公無私斷以大義如此非女中堯舜而
能如是乎伏願 慈殿以此爲法則萬世欽仰而與
宣仁並稱矣當今國步艱難天文告警地震示異諸
路旱傷風水繼作赤地千里民將流轉事有大可憂
者矣臣伏觀 慈旨畏天恤民減膳修省至誠惻怛
不勝感激隕涕若能終始此心無時怠忽則可以轉
災爲祥變禍爲福矣事無大小議諸輔臣如有難處

廣採廷議固得爲政之體矣但近日待倭一事有所
未盡議者謂旣絕遠和有損國體斯言亦有理然三
道如天天之道陰慘陽舒各適其時而不差一歲之
中氣候不同王者之於異類有犯則絕之來服則與
之正所以體天道而示恩威也何損於國體大抵人
主以謙虛待物以仁義柔遠廟堂之上揆時度勢燭
微慮遠防患於未萌消禍於未形使朝野寧靜邊境
無虞生民安業者此真國體也自恃強盛屏絕鄰好
以塞向慕之心恐非久安之道今之武士有志功利
者不以靖邊安民爲急多以致寇攻討爲快臣深以

爲不可借使立功閭外擒斬萬級有何利益於國家
祇以傷和召災而結怨於蠻夷也一將功成吾民之
命殘矣邊將成功不如無事之爲愈也況功未可必
乎孔子曰人而不仁疾之已甚亂又曰與其潔也不
保其往也唯何甚聖人待物之洪如此苗民三旬逆
命而及其來格舜不拒諂利可汗舉兵深入至於渭
水便橋而追其乞和太宗許之矧此葦爾島夷狗鼠
偷竊何足深校今以嗣王女在亮陰不能修答爲辭
是亦可矣但於其辭明示不終絕鄰好之意以慰遠
人之望有何所妨臣以庸疎忝冒重地目覩幾事有

關休戚不敢愛身絨嘿冒昧陳達伏惟
聖慈深
留 睿念更與輔臣商量審處以期萬全不勝幸甚
取進止

已秋劄字

伏以臣聞孟子曰聖人人倫之至又曰堯舜之道孝
弟而已蓋聖人之道雖若高遠而求其所以爲聖者
不過盡人倫之道而已欲盡人倫之道必先於孝弟
人君能盡孝弟之道推之以極其至則通於神明光
于四海堯舜之道豈復有加於此者乎臣昔在
中宗朝入侍經筵嘗引洪範皇極之說解之曰人君

盡人倫之道爲四方之表準語父子則極其親而天下之爲父子者於此取則焉語兄弟則極其愛而天下之爲兄弟者於此取則焉語夫婦則極其別而天下之爲夫婦者於此取則焉夫如是則皇極建而四方之民觀瞻感化自有不能已者矣

中宗深感

於臣言追思前事傷嘆再三言猶在耳未嘗敢忘臣今亦以此獻于

殿下者蓋聖人之道無過於此

者而人君齊家治國之本亦莫先於此者矣臣伏見近日上教悲痛於洪嬪之出外不忍於鳳城之防禁朝野聞之莫不感泣非仁聖友愛之至何以及此

臣竊念

仁宗傳位於主上有父道焉

殿下

當盡子之道此天地之常經古今之通義也頃者伏聞內間有變故事涉王大妃不敢明言臣不勝驚惑萬一因此事殿下所以事王大妃者有絲

毫欠闕則恐於

聖德有虧而後世亦不能無疑

矣臣前日面對時亦嘗略陳是意而未盡焉今乃干

冒再瀆于

聖聰者惟願

殿下全孝弟之德

極人倫之道由是而造堯舜之域由是而興堯舜之

治宗社生靈之福實源於此伏惟

聖慈垂察

焉取進止

政府書啓十條

已七月十八
明宗朝

伏以今

主上幼年嗣位輔養爲急而輔養之本

在於慈殿古之聖賢雖其生質之美亦必有教導

之方以爲本也文母胎教孟母無誑行跡昭昭著在

前訓今古慈天未嘗不欲子賢聖孰無是心豫教於

未生之前養正於三遷之勤尚可爲也況今主

上天質高明氣度夙成國人知之以高明夙成之資

加之以教導之正其於作聖之功有何難哉伏願

慈殿體文母孟母之慈愛其以豫養先示者必出於

正非禮勿視非禮勿聽非禮勿言非禮勿動而先明

夫義利公私之分以立其本則生於心害於事作於
事害於政者自爾而少矣書曰若生子罔不在厥初
生自貽哲命今天其命哲命吉凶命歷年知今我初
服可不慎哉

一宋范祖禹嘗言於哲宗曰陛下今日之學與不學
係他日治亂今

殿下雖在幼年正是養正端習

之時學問之功不可少廢宜精選在朝賢德之士以
補勸講之官經筵之外不拘常例於便殿不時召對
或從容宴語或講論經史或問民間疾苦使情意相
孚進講之官亦不但泛讀數遍而已必伴讀從容以

至詳盡則非徒學問益進其於接士大夫之時亦多
自然涵養德性成就 聖學又令經筵官博考前

例及先儒格論參酌以啓列諸左右以備觀省

一人君之德誠孝爲大而慎終尤大於養生 殿

下於 大行大王有子道焉有臣道焉雖以幼年

不能盡遵禮制然喪次不可以久不臨祀事不可以

久不與當度氣量力無愆大禮以盡誠孝

一自古禍亂多由於宮禁不嚴女謁盛行戚里及小

人攀緣請托以紊朝政陰肆讒說以眩主聽況今幼

主在上尤所當戒請申勅內外嚴其防禁雖戚里問

安亦令有限使內言不出外言不入以杜禍亂之萌
一宮中人必擇溫良恭儉慎而寡言者常在左右浮
靡之習淺俗之言毋使接於耳目亦輔養之一端
祖宗朝選入宮人賤隸商賈之女例不得備選在今
正始之初宜遵祖宗故事諸因緣族屬托養宮中
者一切刷出以嚴內外

一人君之職用人爲大賢愚進退治亂繫焉今

主上年幼未察羣臣賢否除授之間不可用特旨今
後二品以上有關銓曹難慎注擬如或乏人啓稟陞
擬不必備三望

一凡干陳訴及訟事當付諸有司如有難處者議于
朝廷切勿判付以昭公道大抵閨中之事無隱而不
彰如有私意人皆知之除授判付之際或因貨賂或
由親屬以致不明不公人心怨怒厥口詛咒終成土
崩之禍者正由於茲可不危哉

一承政院之職在於出納惟允近來身務承順未聞
封還內旨者殊失惟允之義請令政院內旨有不合
奉行者切宜論啓勿輕施行以盡其職

一後世人主能以宮中府中爲一體者蓋寡況今幼
主在上慈殿攝政宮中府中恐至於歧而爲二也

政有所疑難議諸朝廷罪有所可論付諸有司以昭
平明之理如或議及左右近習間及戚里婚媾私門
一開大柄潛移喪國亡家之患未嘗不由於此可不
戒哉

一大行大王自在東宮沉潛學問以成修身齊家愛
及嗣位發號施令絕無私意公道之行如日照布人
心顯若思見至治曾未幾時奄至斯極遠近號痛若
將胥溺今主上嗣緒一國臣民方以望於
大行大王者望於
殿下其機甚重所以服衆人
之心繫一國之望悉在今日伏願
兩宮留神焉

乙巳秋議啓

凡事大交鄰之際當一以誠信不可少有欺謾前者使臣朝京時華人或問讓老王存歿譯官不敢直辭以亡爲存非徒於義未安後將難處今遣相臣謝恩萬一禮部因嗣王承襲事言及讓老王存歿以一國大臣豈可復爲謾語以欺上國乎臣意宜以實答之但正德皇帝時天使之來有賜物於讓老王不得已以嘉靖某年薨逝爲對可也彼若又問曰其時何不告訃請謚乎則對之甚難然事有難處必須循理善辭臣謹按高麗史獻宗有疾讓位於叔父雞林公熙

臨薨遺命曰我既乞解機務退養殘骸我死歸終諸
事宜從儉約不煩告奏煩瀆天朝故高麗君臣遵其
遺命不敢告奏上國厥後麗王讓位於兄弟者非一
而及其薨也皆不告奏蓋循襲獻宗之例也今可以
此按例爲對矣但聞頃者禮部郎中因請謚事問讓
老王存歿於譯官譯官答以生存今若又問曰汝國
譯官去冬來言讓老王今尚生存何其言之有異耶
則宜答之曰其時譯官無知倉卒妄對極爲駭愕當
治其罪如是爲答則辭順理直亦無異日難處之虞
矣此雖權辭猶勝於以亡爲存欺誣上國之爲未安

也臣之謬見如是請以此更議大臣何如

晦齋先生集卷之十三


故 贈領議政晦齋先生道德學問退溪說之詳
矣奚待後生之贅言第先生之詩文謹嚴精確一
字不苟儒林志學之士願見全集者久矣分雖林
尹李侯齊閔請於方伯盧公韻鳩材募工開板訖
求跋文於希春且索書院中樓齋等名希春何敢
當然千里厚望不可孤謹復之曰先生德美知之
者以爲泰山北斗不知者以爲一時第一流竊觀
先生一生用力小學以進乎大蓋篤學力行而主
靜之意爲多齋樓之名恐不能不出於斯義抑濟
濟章甫景仰高山居斯齋而登斯樓者誠能培明


倫敬身之根達修已治人之枝以無負先生之教
則先生之立言垂範成就來學也爲無窮而諸生
亦無負於先生此今日刊行文集之盛意也侯盍
以是勉諸生萬曆甲戌二月初吉嘉善大夫行弘
文館副提學知製教兼經筵叅贊官春秋館修
撰官同知成均館事柳希春謹跋

萬曆癸酉李冬慶州李晦齋先生之孫浚來見仍
出府尹李侯齊閔書與先生遺稿集會聞是集也
退溪先生手自讎校終年乃畢必極其精而無一
字之未安也曄謹受而讀之曰疏曰劄曰雜文曰
近體率皆典重溫雅深潛縝密粹然一出於正真
有德者之言也先生文集藏諸先生之鄉真所謂
當務之急而府尹公能之其盛意爲如何哉府尹
公又要曄爲之序跋曄雖不文有不可辭者存焉
昔者竊有志於學而未知其方嘉靖辛丑先生侍
講東宮請讀心經附註然後曄始知有此書卽

求于友人許忠吉處敬讀終卷潛玩體驗則方寸
之間似有所主讀閱經史稍知路脉至今不下陷
於惡無非先生之賜也常竊以爲先生晬之聞而
學之之師也景仰之懷無時或弛甲子秋出尹東
京將拜謁于墓下陳情致祭庶幾少償平生之願
而病作旋適至今以爲恨今觀文集寧不重爲之
戚戚哉嘗聞之先生入直玉堂晨興揖同僚終日
默然惟閱經史時聞聲咳數聲而已及至就寢俟
同僚熟寐起坐達曙詢問其家居亦然吁當其默
然必有心得及其夜坐必有精思平生心得其可

限量平生精思其可涯際道日益通德日益高道
德充積於中而英華自發於外是集之作烏可已
乎後之讀是編者誠能得先生用功谿徑夙夜孜
孜愈久而不廢則其與重溫雅深潛緝密之作亦
將在我而有裕矣嗚呼其勉之哉若夫九經衍義
求仁錄諸編待玉堂校畢國本印出後當亦付刊
於此矣求見之士其亦知此意哉萬曆二年孟春
通政大夫成均館大司成知製教陽川許曄謹
跋





卷之五